


O PAZO DE SANTA CRUZ.

Situado no alto da Carrasqueira, atopamos o Pazo de Santa Cruz. Popularmente tamén é coñecido como "Quitapesares", pois coas vistas que se ofrecen da enseada de Bueu dende o pazo curábanse tódalas penas.



Dito pazo foi fundado en 1659 por Fernando de la Rúa Freire, abade de Bueu e comisario do Santo Oficio da Inquisición, como se pode observar nun escudo pétreo no que aparecen os símbolos da Santa Inquisición: unha pluma e unha espada, que nos recordan o lema daquela época: "a letra con sangue entra".

O pazo conta cunha veiga dunhas 11 hectáreas, das cales a maioría é monte, aínda que o edificio tamén conta cun fermoso xardín cun terreo con algunhas esculturas pétreas, hoxe en día desaparecidas.

Artisticamente é característico o segundo portalón, que dá acceso á capela, e que conta na súa parte superior cunhas graciosas estatuíñas que representan uns músicos, e sobre estes, o xa citado escudo cos símbolos da Santa Inquisición.

Ao longo de todo o pazo tamén podemos atopar escudos pertencentes ás diferentes familias que pasaron polo pazo.



O apelido De la Rúa que tiñan os titulares mantívose no pazo, ata que no S.XVIII, a herdeira dos De la Rúa casou cun varón da familia Pimentel, pasando este apelido a ser titular do pazo, que perpetuou ata que en 1945 o pazo foi vendido á familia Bescansa.

Actualmente o pazo pertence á familia de Don Germán Gervás, que o adquiriu en 1983, realizando en dito edificio unha restauración que lle deu o seu aspecto actual, e que fai que estea en tan bo estado de conservación.

A capela que ten o pazo construíuse anos despois do mesmo, pois data de 1671. Está dedicada á devoción da Santa Cruz, de aí o nome do Pazo, aínda que no seu interior tamén se poden venerar santos como Santa Ifigenia, que segundo conta a lenda foi conseguida por un cura párroco nunha partida de cartas. Aínda que outra lenda afirma que a Santa chegou á vila nun barco portugués, do cal os mariñeiros foron apresados e convertidos en escravos, e a santa foi trasladada ao pazo.

Por último, e de modo anecdótico, cabe destacar que este pazo serviu de escenario para gravar en 1982 (pouco antes da súa restauración) a serie "Los Gozos y las sombras".



A FESTA:

A xente da Banda do Río, a comezo da década dos 40, decidiron facer unha festa na honra da Santa Ifigenia, facendo unha misa na capela do pazo. Por aquel entón eran os donos do pazo a familia Pimentel, que non deron autorización para realizar a misa, polo que se decidiu realizar a festa na estrada da Banda do Río, coa denominación de Verbena da Banda do Río, o seu presidente foi Eladio Baena Iglesias.

No 1945 o pazo vendeuse e pasou a mans da familia Bescansa, que aceptan facer a misa no pazo, polo que cada 14 de setembro

ininterrompidamente dende 1945, lévase realizando no pazo unha misa na honra da Santa Ifigenia.

Ao rematar a misa facíase e faise unha pequena procesión coa Santa polo Adro.

Unha peculiaridade desta festa, cuns inicios que se remontan a 1945, é que os campesiños poñen os seus postos bordeando o muro que pecha o pazo. Alí consumíase mel, empanadas, sidra..., esta última é a que aínda sigue a tradición hoxe en día.

Un dos primeiros que iniciou a venda da sidra de mazá no Pazo de Santa Cruz foi Moncho Necuriño, veciño do pazo. Hoxe en día son numerosos os postos que venden a famosa sidra, e tamén son cada ano máis os adeptos á sidra que soben ao pazo a saboreala.

Como recomendación para o voso exquisito padal convidámosvos a non desprezar a ocasión de deleitarvos coa sidra da propia colleita "Troula na Banda".

